



苑詩類選卷之十七

明監察御史包節輯按察司知事前給事中王交校

釋部

寺院附

○富陽浦口和朗上人

何遜

客心愁日暮徒倚空望歸山烟歛樹色江水映霞輝獨  
鶴凌空逝雙鳧出浪飛故鄉千餘里茲夕寒無衣

草堂寺尋無名法師

劉孝先

飛鏡點青天橫照滿樓前深林生夜冷複閣上宵烟葉  
動花中露湍鳴閭裏泉竹風聲若兩山蟲聽似蟬摘果  
仍荷藉的水用花傳一卮聊自飲萬事且蕭然

秋日天中寺尋復禮上人 武三思

妙域三時殿香巖七寶宮金繩先界道玉柄即談空喻  
棧知何極傳燈竟不窮彌天高義遠初地勝因通理詣  
歸一處心行不二中有無雙惑遣真俗兩緣同摘葉疑  
焚翠投花若散紅網珠遙映日簷鐸近吟風定沼寒光  
素禪枝暝色葱頽隨方便力長異釋塵籠

和前

蘇味道

藩戚三雍暇禪居二室隈忽聞從桂苑移步踐花臺敏  
學推多藝高談屬辯才是非寧滯着空有掠嫌猜五術  
幽機暢三番妙鍵開味同甘露灑香似逆風來砌古留

方石池清辨燒灰人尋鶴州返月逐虎谿迴連躡瞻飛  
蓋攀游想玉杯願陪為善樂從此去塵埃

送新羅法師還國

孫逖

異域今無外高僧世所稀苦心窮寂滅宴坐得精微持  
鉢何年至傳燈是日歸上卿揮別藻中禁下禪衣海濶  
杯還渡雲遙錫更飛此行迷處所何以慰虔祈

秦中感秋寄遠上人

孟浩然

一丘常欲卧三徑苦無資此土非吾願東林懷我師黃  
金燃桂盡壯志逐年衰日夕涼風至聞蟬但益悲

夏日過青龍寺謁操禪師 王維



龍鍾一老翁徐步謁禪宮欲問義心義遙知空病空山  
河天眼裡世界法身中莫恠銷炎熱能生大地風

飯覆金山僧

前人

晚知清淨理日與人羣踈將候遠山僧先期掃弊廬果  
從雲峯裡顧我蓬蒿居藉草飯松屑焚香看道書燃燈  
晝欲盡鳴磬夜方初一悟寂為樂此生閑有餘思鄉何  
必深身世猶空虛

遇薛明府謁聰上人

王昌齡

欣逢柏梁故共謁聰公禪石室無人到絕牀見虎眠陰  
崖長抱雪枯澗為生泉出處雖云異同觀在法筵

偃師東與韓尊同訪暉上人即事

岑參

山陰老僧解楞伽潁陽歸客遠相過烟深草濕昨夜雨  
雨後秋風渡渭河空山終日塵事少平郊遠見行人渺  
尚書磧上黃昏鍾別駕渡頭一歸鳥

晚過磐石寺禮鄭和尚

前人

暫詣高僧話來尋野寺孤岸花藏水碓溪竹映風鑪頂  
上巢新鵲衣中得舊珠談禪未得去輟棹且踟躕

送僧

張謂

童子學脩道誦經永出家手持多貝葉心念復曇花得



度北州近隨緣東路賒一身求清淨百毳納袈裟鍾嶺  
更飛錫爐峯期結迦深心大海水廣願度怕沙此去不  
堪別彼行安可涯慙懃結香火來世上牛車

送青龍一公

前人

事佛輕金印勤王度玉關不知從樹下還肯到人間楚  
水青蓮淨吳門白日閑聖朝須助理絕莫愛東山

送少微上人遊天台

劉長卿

石橋人不到獨往更迢迢乞食山家少尋鍾野寺遙松  
門風自掃瀑布雪難消秋夜聞清梵餘音逐海潮

送靈澈上人歸嵩陽蘭若

前人

南地隨緣久東林幾歲空暮山門獨掩春草路難通作  
梵連松韻焚香入桂叢唯將舊瓶鉢却寄白雲中

送道標上人歸南岳

前人

悠悠倚孤棹却憶卧中林江草行將遠湘江往獨深白  
雲留不住綠水去無心衡岳千峯亂禪房何處尋

送勤照和尚往睢陽赴太守請

前人

燃燈傳七祖杖錫為諸侯去住雲無意東西水自流青  
山春滿目白月夜隨舟知到梁園下蒼生賴此游

初至碧澗招明契上人

前人

漸老知身累初寒曝背眠白雲留永日黃葉減餘年猿  
護窓前樹泉澆谷口田沃洲能共飲不用道林錢

秋夜肅公房喜普門上人自陽羨山至

前人

山棲久不見林下偶同遊早晚來香積何人住沃洲寒  
禽驚後夜古木帶高秋卻入千峯去孤雲不可留

送靈澈上人還越中

前人

禪客無心杖錫還沃洲深處草堂閑身隨敝履經殘雪  
手綴寒衣入舊山獨向青谿依樹下空留白日在人間  
那堪別後長相憶雲木蒼蒼但閉關

送惠法師遊天台因懷支大師故居

前人

翠屏瀑布知何在鳥道猿啼過幾重落日獨搖金策去  
深山誰向石橋逢定攀巖下叢生桂欲買雲中若箇峯  
想憶東林禪誦處寂寥唯聽舊時鍾

贈鑒上人

皇甫冉

律儀傳教誘僧膈老烟霄樹色依禪誦泉聲入寂寥寶  
龕經末劫畫壁見南朝深竹風開合寒潭月動搖息心  
歸靜理愛道坐中宵更欲尋真去乘船過海潮

秋夕寄懷契上人

前人



已見槿花朝委露獨悲孤鶴在人群真僧出世心無事  
靜夜名香手自焚窓臨絕澗聞流水客至孤峯掃白雲  
更想清晨誦經處獨看松上雪紛紛

同杜相公對山僧

前人

吏散重門掩僧來深閣閑遠心馳北闕春興寄東山草  
長風先裏鶯啼靜默間芳晨不可住惆悵暮禽還

山齋獨坐喜玄上人見訪 錢起

舍下虎溪徑烟霞入暝開柴門兼竹靜山月與僧來心  
瑩紅蓮水言忘綠茗杯前峯曙更早斜漢欲西迴

送僧歸日本

前人

上國隨緣住來途若夢行浮天滄海遠去世法舟輕水  
月通禪觀魚龍聽梵聲唯憐一燈影萬里眼中明

送蔡上人兼寄梁鎮員外 邨士元

季月還鄉獨未能林行淡宿厭層冰尺素欲傳三署客  
雪山愁送五溪僧連空朔氣橫秦苑滿日寒雲隔灞陵  
借問從來香積寺何時携手更同登

送弘志上人歸湖州 李嘉祐

山林唯好靜行住不妨禪高月穿松徑殘陽過水泉詩  
從宿世悟法為本師傳能使南人敬修持香火緣

同皇甫冉赴官送別靈一上人

法許廬山遠詩傳休上人獨歸雙樹宿靜與百花親對  
酒雖留興觀空已悟身能令折腰客遙賞竹房春

前人

送恒操上人歸江外觀省 盧綸

依佛不違親高堂與寺隣問安雙樹曉來膳一僧貧持  
呪過龍廟翻經化海人還同會休去儒者亦露巾

夜投終南豐德寺謁海上人

李端

半夜中峯有磬聲偶逢樵者問山名上方月曉聞僧語  
下界林疎見客行野鶴巢邊松最老毒龍潛處水偏清

願得遠公知姓字焚香洗鉢過浮生

憶皎然上人

前人

未得從師去人間萬事勞雲門不可見山木已應高向  
日開柴戶驚秋問敝袍何由宿峯頂窓裏望波濤

送少微上人入蜀

前人

削髮本求道何方不是歸松風開法席江月濯禪衣飛  
閣後鳴早漫天客過稀戴顓常執筆不覺此身非

寄天台秀禪師

司空曙

天台漫布寺傳有白頭師幻跡示羸病空門無住持霜  
晴看鶴去海夜與龍期永願親瓶履澄心得問疑



深上人見訪憶李端

前人

鴈稀秋色盡落日對寒山  
避事多稱疾留僧獨閉關  
心歸塵俗外道勝有無間  
仍憶東林友相期久不還

閑園即事寄陳公

前人

欲就東隣寄一身尚憐兒  
女未成人柴門客去殘陽  
在藥圃蟲喧秋雨頻近水  
方同梅市隱曝衣多笑阮  
家貧深山蘭若何時到羨  
與閑雲作四隣

贈岳陽隱禪師

前人

擁褐安居南陌頭白雲高  
寺見衡州石窓湖水搖寒  
月楓樹猿聲報夜秋講席  
舊逢沙鳥至梵經初向竺  
僧求

垂垂身老將傳法因下人間遂北遊

贈朗公

耿緯

來自西天竺持經奉紫微  
年深梵語變行苦俗流歸  
月上安禪久苔生出院稀  
梁間有馴鴿不去為忘機

送真上人歸山蘭若

崔峒

得道雲林下年深暫一歸  
出山逢世亂乞食覺人稀  
半偈初傳法中峯又掩扉  
愛離應不染塵俗自依依

潤州送師弟自江夏往台州

前人

遠客乘流去孤帆向夜開  
春風江上使前日漢陽來  
別

路猶千里離心重一杯剡溪木未落羨爾過天台

送遠上人歸京

冷朝陽

夏臆歲方深思歸徹曙吟未離消雪院已有過雲心寒  
磬清函谷孤鍾宿華陰到京遊舊寺月色似雙林

送亮法師

戎昱

達士心無滯他方摠是家問經翻貝葉論法指蓮花欲  
契真如義先開智慧芽不知飛錫後何處是恒沙

西陵懷靈一上人兼寄朱放

張南史

淮海風濤起江關幽思長同悲鵲遶樹獨作鴈隨陽山

晚雲藏雪汀寒月照霜由來濯纓處漁父愛滄浪

寄淨虛上人雲門

前人

寒日白雲裡法侶自提携竹徑通城下松門隔水西方  
同沃州去不自武陵迷彷彿心疑處高峯是會稽

秋夜聞鴈寄南十五兼呈空和上人

前人

晚節聞君趣道深結茅栽樹近東林大師幾度曾摩頂  
高士何年更發心止渚三更聞過鴈西城萬木動寒砧  
不見支公與玄度相思擁膝坐長吟

送賈校書東歸寄振上人

李益



北風吹鴈數聲悲况指前林似別時秋草不堪頻送遠  
白雲何處更相期山隨匹馬行看暮路入寒城獨去遲  
為向東州故人道江淹已擬惠休詩

送少微上人入蜀

戴叔倫

十方俱是夢一念偶尋山望刹經巴寺持瓶向蜀關亂  
猿心本定流水性長閒世俗多離恨王城幾日還

湖上晚望呈惠上人

權德輿

湖上烟景好鳥飛雲自還幸因居止逸日覺性情閒獨  
酌尔臨水清機常見山此時何所憶淨侶話玄關

送義舟師卻還黔南

劉禹錫

黔江秋水漫雲霓獨泛慈航路不迷猿狖窺齋林葉動  
蛟龍聞呪浪花低如蓮半偈心常苦問菊新詩手自携  
常說摩圍似靈鷲却將山屐上丹梯

送淡公歸嵩山龍潭寺葬本師

楊巨源

野烟秋水蒼茫遠禪境真機去住閑雙樹為家思舊壑  
千花成塔禮寒山洞宮曾向龍邊宿雲徑應從鳥外還  
莫戀本師金骨地空門無處復無關

送覺興上人歸中條山兼謁河中李司空

姚合

久憶西岩寺秦原草白時山尋樵徑上人到雪房遲暮  
壑潭泉凍荒林野火移聞師新譯偈說擬對旄麾

送元晝上人歸蘇州兼寄張厚

許渾

二年無事客吳鄉南陌春園碧草長共醉八門迴畫舸  
還尋三徑掩書堂前山雨過池塘滿小院秋歸枕簟涼  
經歲別離心自苦何堪黃葉下清漳

贈天卿寺神亮上人

趙嘏

吾看春盡此江濱花自零風日自曛空有慈悲隨佛念  
已無踪跡在人群迎秋日色簷前見入夜鍾聲竹外聞

笑指白蓮心自得世間煩惱是浮雲

題崇聖寺簡雲端僧錄

前人

暮塵飄盡客愁長來扣禪關月滿廊宋玉逢秋空雪涕  
淨名無地可容牀高雲覆檻千巖樹踈磬含風一夜霜  
迴首故園紅葉外只將多病告醫王

磐石寺留別成公

溫庭筠

槲葉蕭蕭帶葦風寺前歸路別支公三秋岸雪花初白  
一夜林霜葉盡紅山疊楚天雲壓塞浪搖吳苑水連空  
悠然旅榜頻迴首無復松窓半偈同

寄清涼寺僧

前人



石路無塵竹逕開昔年曾伴戴顓來窓間半偈聞鐘後  
松下殘碁送客迴簷向玉風巖夜雪砌因藍水長秋苔  
白蓮社裡如相問為說遊人是姓雷

送堅上人歸杭州天竺寺 釋清江

十年勞負笈經論化中朝流水知鄉近和風惜別遙雲  
山零夜雨花岼上春潮歸卧南天竺禪心更寂寥

送贊律師嵩 前人

禪客歸山意山深定易安清貧修道苦孝友別家難雪  
路尋溪轉花宮映岳看到時雲塔暮松月向人寒

送王法師之西川 釋靈一

旅遊無遠近要自別魂銷官柳聊愁亂春山客路遙伴  
行芳草遠隨興墅花飄計日成功後還將輔聖朝

送贊上人還京 釋皎然

久遊春草盡還寄此船歸沙鳥窺中食江雲滿淨衣秦  
原山色近楚寺磬聲微見說翻經館多聞似爾稀

送重鈞上人遊天台 前人

漸看華頂出幽賞意隨生十里行松色千重過水聲海  
容雲正盡山態雪初晴事事將心證知君道可成

送契上人遊 前人

西陵古江口遠見東陽州綠水不同泛春山應獨遊尋

僧白巖寺望月謝家樓宿昔心期在人寰非久留  
早秋桐廬思歸示道該上人

前人

桐江秋信早憶在故山時靜夜風鳴磬無人竹掃埽猿  
來觸淨水鳥下啄寒梨何暇關吾事歸心自有期

冬送鑒供奉歸蜀寧親

釋靈徹

林間出定戀庭闈聖主恩深暫許歸雙樹欲辭金錫冷  
四花猶向玉階飛梁山拂漢分清境蜀雪和烟惹翠微  
此去不須來綠服紫衣全勝老萊衣

秋夜寄龍池寺真空二上人

釋無可

夜來思道侶木葉向人飄精舍池邊古秋山月下遙磬  
寒通幾里雲白已終宵未得同居止儵然自寂寥

送顥法師還太原兼謁李司空

前人

近牘辭精舍并州謁上公路長山忽盡塞廣雪無窮講  
席開晴壘禪衣涉遠風聞經諸弟子應滿北門中

冬晚姚諫議宅會送元緒上人歸南山

前人

禪客詩家見凝寒忽告還分題迴諫筆留偈出商關盤



徑緣高雪開房在半山自知麋鹿性亦欲離人間以上釋

○徃虎窟山寺

梁簡文帝

細松斜繞徑峻嶺半藏天古樹無枝葉荒郊多野烟分  
花出黃鳥挂石下新泉翁鬱均雙樹清靈類八禪棲神  
紫臺上縱意白雲邊徒然嗟小藥何由齊大年

蒙豫懺悔

同前

皇情矜幻俗聖德愍重昏制書開攝受絲綸廣慧門時  
英滿君園法侶盛天園俱消五道縛共蕩四生寃三循  
祛愛馬六念靜心猿庭深伏采艷地寂偈聲喧上風吹  
法鼓垂鈴鳴書軒新梅含未發落桂聚還翻早燈藏石

磴寒潮侵水門一期蒙誘善方願遣籠樊

望同泰寺浮圖

同前

遙看官佛圖帶壁復垂珠燭龍踰漢汝寶鐸邁昆吾日  
起光芒散風吟宮徵殊露落盤恒滿桐生鳳不雛飛幡  
雜晚虹音絳書鳥狎晨鳧梵世臨空下應真蔽景趨帝馬  
咸千轡天衣使六銖廣樂開長表多寶現金軀能令苦  
海渡復使慢山踰願能周四忍長當出五居

詠同泰寺浮圖

庾肩吾

望園臨柰苑王城對鄴宮還從飛閣內遙見岷山中天  
衣疑拂石鳳翅欲凌空雲霓猶帶雨蓮井不生桐盤承

雲表露鈴搖天上風月出琮含采天晴幡帶虹周星疑  
更落漢夢似今通我后懷初照不與伊川同方應捧馬  
出永得離塵蒙

和前

庾信

岩岩凌太清照殿比東京長影臨雙闕高層出九城拱  
積行雲礙幡搖度鳥驚花飛如始落蓮合似初生輪重  
對月滿鐸韻擬鸞聲畫水流全住圖雲色半輕露晚盤  
猶滴珠朝火更明雖連博望苑還接銀沙城天香下桂  
殿仙梵入伊笙庶同八界樂方遣六塵情

和七名法師秋夜草堂寺禪房月下

劉孝先

幽人住山北月上照山東洞戶臨松徑虛窓隱竹叢出  
林避炎影步逕逐涼風平雲斷高岫長河隔淨空數螢  
流暗草一鳥宿踈桐興逸烟霄上神閑宇宙中還思城  
闕下何異處樊籠

同江僕射遊攝山棲霞寺 陳後主

時宰礚溪心非關狎竹林驚嶺青松繞雞峯白日沉天  
迥浮雲細山空明月深摧殘枯樹影零落古藤陰霜月  
夜鳥去風露寒猿吟自可盡出俗詎是願抽簪

陪衡陽王遊耨耨寺

張正見



其崇聽訟罷福宇試登臨  
兔苑移飛蓋王城列玳簪  
階荒猶累玉地古尚填金  
龍橋丹桂偃鷲嶺白雲深  
秋窓被旅葛夏戶響山禽  
清風吹麥壠細雨濯梅林

遊巴陵空寺

陰鏗

日宮朝絕磬月殿夕無扉  
網交雙樹葉輪斷七燈輝  
香燼奩猶馥幡塵盡漸微  
借問將何見風氣動天衣

和周趙王遊雲居寺

庾信

重巒千仞塔危磴九層臺  
石關還逆上山梁乍陟迴階  
下雲峯出窓前風洞開  
隔嶺鍾聲應中天梵響來  
于時欣侍從於此共徘徊

明慶寺

江總

十五詩書日六十軒冕年  
名山極歷覽勝地殊留連  
幽巖聳絕壁洞穴瀉飛泉  
金河知證果石室乃安禪  
市朝霑草露淮海作桑田  
夜梵聞三界朝香徹九天  
山階步皎月澗戶聽涼蟬  
何言望鍾嶺更復切秦川

攝山棲霞寺山房夜坐簡徐祭酒周尚書

前人

澡身事珠戒非是學金丹  
月磴時橫枕雲崖宿解鞍  
梵宇調心易禪庭數息難  
石澗水流靜山窓葉去寒  
君思此闕駕我惜東都冠  
翻然夜鍾盡同志不盤桓

入龍丘巖精舍

前人

法堂猶集鴈仙竹幾成龍聊承丹桂馥遠視白雲峯風  
窓穿石竇月牖拂霜松暗谷留征鳥空林徹夜鍾陰崖  
未辯色疊樹豈知重溘此哀時命吁嗟世不容無由訪  
詹尹何去復何從

經始興廣果寺題愷法師山房

前人

息舟候香阜悵別在寒林竹近交枝亂山長絕逕深輕  
飛入定影落照有疎陰不見投雲狀空留折桂心

和崔侍中從駕經山寺

蕭愨

鈎陳夜警徼河漢曉參橫遊騎騰文馬前驅轉翠旌野  
禽喧曙色山樹動秋聲雲表金輪見巖端畫拱明塔疑  
從地涌蓋似積香成泉高下流急松古上枝平儀台多  
壯思麗藻蔚緣情自嗤非照乘何以繼連城

登白馬山護明寺

孔德昭

名岳標形勝危峯遠鬱紆成象建環極大壯闡規模曾  
臺聳靈鷲高殿通陽烏暫同遊閬苑還類入仙都三休  
開碧嶺萬戶洞金鋪攝心罄前禮訪道挹中衢遙瞻盡  
地軸長望極天隅白雲起梁棟丹霞映拱樞露花疑濯  
錦泉月似沉珠今日桃源客相顧失歸途



七月十五日題章敬寺

唐高宗

招提邇皇邑復道連重城法筵會早秋駕言訪禪扃嘗  
聞大仙教清淨宗世生七物匪吾寶萬行先求成名相  
既雙寂繁華奚所榮金風扇微涼遠烟凝翠晶松院靜  
苔色竹房深磬聲境幽真慮恬道勝外物輕意適本非  
悅含毫空復清

遊梵宇三覺寺

王勃

杏閣披青磴瑤臺控紫岑葉齊山路狹花積野壇深蘿  
幌棲禪影松門聽梵音遽忻陪妙躅延賞滌煩襟

石鏡寺

盧照隣

古墓芙蓉塔神銘松栢烟鸞沉仙鏡底花没梵輪前銖  
衣千古佛寶月兩重圓隱隱香臺夜鍾聲徹九天

樂城白鶴寺

沈佺期

碧海開龍箴青雲起鴈堂潮聲迎法鼓雨氣濕天香樹  
接前山暗溪承瀑水涼無言誦居遠清淨得空王

遊少林寺

前人

長歌遊寶地徙倚對珠林鴈塔風霜古龍池歲月深絀  
園澄夕霽碧殿下秋陰歸路烟霞晚山蟬處處吟

遊韶州廣果寺

宋之問

影殿臨丹壑香臺隱翠霞巢飛銜象鳥砌躅雨空花寶

鐸搖初霽金池映晚沙莫愁歸路晚門外有三車

宿清遠峽山寺

前人

香岫懸金刹飛泉界石門空山唯習靜中夜寂無喧說  
法初聞鳥看心欲定猿寥寥隔塵事何異武陵源

遊法華寺

前人

高岫擬耆闍真乘引妙車空中結樓殿意表出雲霞後  
果傳三足前因感六牙冥林薰寶樹水溜滴金沙寒谷  
梅猶淺温庭橘未華臺香紅藥亂塔影綠篁遮果漸輪  
王族緣超梵帝家晨行踏忍草夜誦得靈花江郡將何  
匹天都亦未加朝來沿泛所應是逐仙查

遊雲門寺

前人

維舟探靜域作禮事尊經投跡一蕭散為心自杳冥龕  
交大禹穴樓倚少微星沓嶂圍蘭若迴溪抱竹庭覺花  
塗砌白甘露洗山青鴈塔騫金地虹橋轉翠屏人天宵  
合景神鬼晝潛形理勝常虛寂緣空自感靈入禪從鶴  
繞就法有龍聽劫累終期滅塵躬豈暫寧搖搖不安寐  
待月詠崑崙

遊稱心寺

前人

釋事懷三隱清襟謁四禪江鳴潮未落林曉日初懸寶  
葉交香雨金沙吐細泉望諧舟客趣思發海人烟顧極



仍留馬乘杯久棄船未憂龜負岳且識鳥耘田理契都  
無象心冥不寄筌安期庶可揖天地得齊年

題杭州天竺山

前人

鷲嶺鬱岩堯龍宮鎖寂寥樓觀滄海日門對浙江潮桂  
子月中落天香雲外飄捫蘿登塔遠刻木取泉遙霜薄  
花更發冰輕葉互凋夙齡尚遐異搜對滌煩囂會入天  
台路看余渡石橋詩話云之問游靈隱寺吟首二句不  
能續一老僧曰何不道云云遂疑為  
駱賓王作交考駱舊有贈之問詩則  
固素知其人者此言恐或未然也

慈恩寺二月半寓言

蘇頌

二月韶春半三空霽景初獻來應有受滅盡竟無餘化

跡傳宮寺歸城謁梵居殿堂花覆席觀閣柳垂旒共命  
枝間鳥長生水上游問津窺彼岫迷路得真車行密幽  
關靜談精俗態祛稻麻欣所遇蓬籜愴焉如不駐秦京  
陌還題蜀郡輿愛離方自此迴望獨躊躇

清遠江峽山寺

張說

流落經荒外逍遙此梵宮雲峯吐日月石壁淡烟虹寶  
塔靈仙湧懸龕造化功天香涵竹氣虛貝引松風簷牖  
飛花入廊堦激水通猿鳴知谷靜魚戲辯江空淨默將  
何貴所貴心鏡同

奉和崔司馬遊雲門寺

孫逖

繫馬清溪樹禪門春氣濃香臺花下出講座竹間逢覺  
路山童引經行谷鳥從更言窮寂滅迴策上南峯

和崔司馬登稱心寺

前人

郡府乘休日王城訪道初覺花迎步履香草籍行車倚  
閣觀無際尋山盡太虛巖空迷禹跡海靜望秦餘翡翠  
巢珠網鷓雞間綺疏池靈資靜土水若護真如寶樹誰  
攀折禪雲自卷舒晴分五湖勢烟合九夷居生滅分無  
象窺臨已得魚嘗聞寶刀贈今日奉瓊琚

同皇甫冉兵曹天官寺浴室新成招友人

冠垣

溫室歡初就蘭交託勝因共聽無漏法兼濯有為塵水  
潔三空性香霑四大身清心多善友頌德慰同人

臘月八日於剡縣石城寺禮拜

孟浩然

石壁開金象香山繞鐵圍下生彌勒見迴向一心歸松  
竹禪庭古樓臺世界稀夕嵐增氣色餘照發光輝講席  
邀談柄泉堂施浴衣願承功德水從此濯塵機

題融公蘭若

前人

精舍買金開流泉繞砌迴芟荷薰講席松栢映香臺法  
雨晴飛去天花晝下來談玄殊未已歸騎夕陽催



陪姚使君題惠上人房

前人

帶雪梅初暖含烟柳乍青去窺童子偈來聽法王經會  
理知無我觀空厭有形迷心因覺寤客思不遑寧

題遠公經臺

祖詠

蘭若無人到真僧出復稀苔侵行道席雲濕坐禪衣澗  
鼠緣香案山蟬噪竹扉世間長不見寧止暫忘歸

宿龍興寺

綦毋潛

香刹夜忘歸松青古殿扉燈明方丈室珠繫比丘衣白  
月傳心靜青蓮喻法微天花落不盡處處鳥衡飛

題靜林寺山頂禪院

前人

招提此山頂下界不相聞塔影掛清漢鐘聲扣白雲觀  
空靜室掩行道衆香焚且駐東來駕人天日未曛

過上人蘭若

前人

山頭禪室掛僧衣窓外無人溪鳥飛黃昏半在山下路  
卻聽鐘聲連翠微

題鶴林寺

前人

道門隱形勝向背臨層霄松覆山殿冷花藏溪路遙珊  
珊寶幡挂焰焰明燈燒遲日半空谷春風連上潮少憑  
水木興慙忝身心調願謝携手客茲山禪侶饒

龍興天竺寺

前人

郡有化城最西窟，疊嶂深松門。當澗口石路在峯心，幽見夕陽霽。高逢暮雨陰，佛身瞻紺髮。寶地踐黃金，雲向竹溪靜。月從花洞臨，因物成真悟。遺世在茲岑。

遊化感寺

王維

翡翠香烟合，琉璃寶殿平。龍宮連棟宇，虎穴傍簷楹。谷靜唯松響，山深無鳥聲。瓊峯當戶拆，金澗透林鳴。郢路雲端迥，秦川雨外晴。馮王街果獻，鹿女踏花行。抖擻辭貧里，歸依宿化城。繞籬生野蕨，空館發山櫻。香飯青菰米，嘉蔬綠筍根。誓陪青梵末，端坐學無生。

過化感寺曇興上人山院 前人

暮持筇竹杖，相待虎溪頭。催客聞山響，歸房逐水流。野花藜發好，谷鳥一聲幽。夜坐空林寂，松風真似秋。

過福禪師蘭若 前人

巖壑帶松逕，雲林隱法堂。羽人飛奏樂，天女跪焚香。竹外峯偏曙，藤陰水更涼。欲知禪坐久，行路長春芳。

春日上房即事 前人

好讀高僧傳，時看辟穀方。鳩形將刻杖，龜殼用支牀。柳色春山映，梨花夕鳥藏。此窓桃李下，閑坐但焚香。

登新覺寺 前人

竹逕從初地，蓮峯出化城。窓中三楚盡，林外九江平。嫩



草承趺坐長松響梵聲空居法雲外觀世得無生

題香積寺

王昌齡

不知香積寺數里入雲峯古木無人徑深山何處鍾泉  
聲咽危石日色冷青松薄暮空潭曲安禪制毒龍

與蘇盧二貞外期遊方丈寺而蘇不至因有

此作

前人

共仰頭陀行能忘世諦情迴看雙樹闕相去一牛鳴法  
向空林說心隨寶地平手巾花氎淨香帔稻畦成問道  
邀同舍相期宿化城安知不來往翻得似無生

題石窟寺

魏孝文所置

宋昱

梵宇開金地香龕鑿鐵圍影中群象動空裡衆靈飛簾  
幄籠朱旭房廊鎖翠微瑞蓮生佛步寶樹挂天衣邀福  
功雖在興王代久非誰知雲朔外更覩化胡歸

過曇興上人山院

裴迪

不遠霸陵遠安居向十年入門穿竹逕留客聽山泉鳥  
嘯深林裡心閒落照前浮名竟何益從此願棲禪

山寺

杜甫

野寺殘僧少山園細路高麝香眠石竹鸚鵡啄金桃亂  
水通人過懸崖置屋牢上方重閣晚百里見纖毫

奉和裴十四迪新津山寺寄王侍郎

何恨倚山木吟詩秋葉黃  
蟬聲集古寺鳥影度寒塘  
風物悲遊子登臨憶侍郎  
老夫貪佛日隨意宿僧房

宿贊公房

前人

杖錫何來此秋風已颯然  
雨荒深院菊霜倒半池  
蓮放逐寧違性虛空不離  
禪相逢成夜宿隴月向人圓

上堯率寺

前人

堯率知名寺真如會法堂  
江山有巴蜀棟宇自齊梁  
庾信哀雖久何顛好不忘  
白牛車遠近且欲上慈航

秦州雜詩

前人

秦州城北寺勝跡隗囂宮  
苔蘚山門古丹青野殿空  
月明垂葉露雲逐度溪風  
清渭無情極愁時獨向東

同諸公遊雲東禪寺

張謂

共許尋雞足誰能惜馬蹄  
長空淨雲雨斜日半虹霓  
簷下千峯轉窓前萬木低  
看花尋徑遠聽鳥入林迷  
地與喧聞隔人將物我齊  
不知樵客意何事武陵溪

長沙失火後戲題蓮花寺

前人

金園寶刹半長沙燒劫旁延一萬家  
樓殿摠隨烟焰盡火中何處有蓮花

題破山寺後禪院

常建



清晨入古寺初日照高林竹徑通幽處禪房花木深山  
光悅鳥性潭影空人心萬籟此俱寂唯餘鍾磬音

過隱居和尚故居

劉長卿

自從飛錫去人到沃州稀林下期何在山中春獨歸  
花尋舊徑映竹掩空扉寥落東峯上猶堪靜者衣

秋夜雨中諸公過靈光寺所居

前人

晤語青蓮舍重門閉夕陰向人寒燭靜帶兩夜鍾深流  
水從他事孤雲任此心不能捐斗粟終日愧瑤琴

自道林寺西入石路至麓山寺過法嵩師故

居

前人

山僧候谷口石路拂莓苔深入泉源去遙從樹杪回香  
隨青靄散鍾過白雲來野雪空齋掩山風古殿開桂寒  
知自發松老問誰栽惆悵湘江上何人更渡杯

登思禪寺題上方

前人

西峯上方處臺榭隱朦朧遠磬秋山裡清猿古木中衆  
溪連竹路諸嶺共松風儻許棲林下甘成白首翁

將赴嶺外畱題蕭寺遠公院寺即梁朝蕭內

史劄

前人

竹房遙閉上方幽苔徑蒼蒼訪昔遊內史舊山空日暮

南朝古木向人秋天香月色同僧室葉落猿啼傍客舟  
此去播遷明主意白雲何事欲相留

宿香山寺石樓

前人一作李頎

夜宿翠微半高樓聞暗泉漁舟帶遠火山磬發孤烟衣  
拂雲松外門清河漢邊峯巒低枕席世界接人天靄靄  
花出霧輝輝星映川東林曙鶯滿惆悵欲言旋

招隱寺送閻判官還江西皇甫冉

離別那逢秋氣悲東林更作上方期共知客路浮雲外  
暫愛僧房墜葉時長江九派人歸少寒嶺千重鴈度遲  
借問潯陽在何處每看潮落一相思

酬王孝友秋夜宿靈臺寺見寄

郎士元

石林精舍虎溪中夜扣禪扉謁遠公月在上方諸品靜  
心持半法萬緣空蒼苔古道行應徧落木寒泉聽不窮  
更憶雙峯最高頂此心期與古人同

同中書劉舍人題青龍上方

韓翃

西掖歸來後東林靜者期遠峯春雪裡寒竹暮天時來  
問金人偈閑聽寶月詩更憐茶興在好出下方遲

題薦福寺衡岳暕師房 前人



春城乞食還高論此中閑僧臘塔前樹禪心江上山踈  
簾看雪卷深院映花關晚送門人出鐘聲杳靄間

題僧房

前人

披衣聞客到闕鎖此時開鳴磬夕陽盡卷簾秋色來名  
香連竹逕清梵出花臺身在心無住他鄉到幾迴

春日陪李庶子遵善寺東院曉望

盧綸

映竹水橫分當山起鴈羣陽峯高對寺陰井下通雲雪  
晝誰逢鶴花時此見君由來禪誦地多有謝公文

廢慶寶寺

司空曙

黃葉前朝寺無僧寒殿開池晴龜出曝松暝鶴飛迴古  
砌碑橫草陰廊盡雜苔禪宮亦銷歇塵世轉堪哀

送曹三原猗遊山寺

前人

山路青蕪盡涼秋古寺深何時得蓮葉此夜更聞琴窮  
水雲同穴過僧虎共林殷勤如我念遺爾挂冠心

宿青龍寺故曇上人院

前人

年深宮院在舊客自相逢閉戶臨寒竹無人有夜鍾降  
龍今已去巢鶴竟何從坐見繁星曉淒涼識舊峯

題靈雲寺

前人

春山古寺遶滄波石磴盤空鳥道過百丈金身開翠殿

萬龕燈焰隔烟蘿雲生客到侵衣濕花落僧禪覆地多  
不與方袍同結社下歸塵世竟如何

題疎上人院

前人

閉門不出自焚香擁褐看山歲月長雨後綠苔生石井  
秋來黃葉徧繩牀身閑何處無真性年老曾來隱故鄉  
更說本師同學在幾時携手問衡陽

登蔣山開善寺

戴叔倫

山殿秋雲裡香烟出翠微客尋朝磬至僧背夕陽歸下  
界千門見前期萬事非看心兼送日葭茨暮依依

題崇福寺禪院

前人

僧家更無事掃地與焚香幽磬度山翠閑雲來竹房身  
心塵外遠歲月坐中長向晚禪堂閉無人空夕陽

與沈十九拾遺同遊棲霞寺上方夜於亮上人院會宿

權德輿

偶來人境外心賞幸隨君古殿烟霞夕深山松桂薰巖  
花點寒溜石磴掃春雲清淨諸天近喧塵下界分名僧  
康寶月上客沈休文共宿東林夜清猿徹曙聞

杭州孤山寺

張祜

樓臺聳碧岑一徑入湖心不雨山長潤無雲水自陰斷  
橋荒蘚合空院落花深猶憶西窓夜鍾聲到此林



金山寺

前人

一宿金山頂微茫水國分僧歸夜船月龍出曉堂雲樹影中流見鍾聲兩岼聞因悲在城市終日醉醺醺

秋宿慈恩寺遂上人院

李頎

滿閣終南色清秋獨倚欄風高斜漢動葉下曲江寒帝里來名老空門見性難吾師無一事不似在長安

遊少華山甘露寺

張喬

少華中峯寺高秋衆景歸地連秦塞起河隔晉山微晚木蟬相應涼天鴈並飛殷勤寄巖石只恐再來稀

遊鍾山開善寺

徐伯陽

聊追鄴城友躡步出蘭宮法侶殊人世天花異俗中鳥聲不測處松吟未覺風此時超愛網還復洗塵蒙

遊棲霞寺

張暈

躋險入幽林翠微含竹殿泉聲無休歇山色時隱見潮來輕風雨梅落成霜霰一從方外遊頗覺塵心變

遊始興廣果寺山房

房融

零落嗟殘命蕭條托勝因方燒三界火遽洗六情塵隔嶺天花發凌空月殿新誰憐鄉國思從此學分身

宿吳匡山破寺

釋皎然

雙峰百戰後真界滿塵埃蔓草緣空壁悲風起古臺野

花寒更發山月暝還來何事池中水東流獨不迴以上

苑詩類選卷之十七

終





